

魏書
(下)

中華書局印行

齊

魏

收

撰

列傳第五十四

李崇 崔亮

李崇字繼長小名繼伯頓丘人也文成元皇后第二兄誕之子年十四召拜主文中散襲爵陳留公鎮西大將軍高祖初爲大使巡察冀州尋以本官行梁州刺史時巴氏擾動詔崇以本將軍爲荊州刺史鎮上洛勅發陝秦二州兵送崇至治崇辭曰邊人失和本怨刺史奉詔代之自然易帖但須一宣詔旨而已不勞發兵自防使懷懼也高祖從之乃輕將數十騎馳到上洛宣詔綏慰當卽帖然尋勦邊戎掠得蕭贖人者悉令還之南人感德仍送荊州之口二百許人兩境交和無復烽燧之警在治四年甚有稱績召還京師賞賜隆厚以本將軍除兗州刺史兗土舊多劫盜崇乃村置一樓樓懸一鼓盜發之處雙槌亂擊四面諸村始聞者搗鼓一通次復聞者以二爲節次後聞者以三爲節各擊數千槌諸村聞鼓皆守要路是以盜發俄頃之間聲布百里之內其中險要悉有伏人盜竊始發便爾擒送諸州置樓懸鼓自崇始也後倒降爲侯改授安東將軍車駕南征驃騎大將軍咸陽王禧都督左翼諸軍事詔崇以本官副焉徐州降人郭陸聚黨作逆人多應之搔擾南北崇遣高平人卜冀州詐稱犯罪逃亡歸陸陸納之以爲謀主數月冀州斬陸送之賊徒潰散入爲河南尹後車駕南討漢陽崇行梁州刺史氏楊靈珍遣弟婆羅與子雙領步騎萬餘襲破武興與蕭鸞相結詔崇爲使持節都督隴右諸軍事率衆數萬討之崇槎山分進出其不意表裏以襲羣氏皆棄靈珍散歸靈珍衆滅大半崇進據赤土靈珍又遣從弟建率五千人屯龍門躬率精勇一萬據破龍門之北數十里中伐樹塞路驚破之口積大木聚礮石臨崖下之以拒官軍崇乃命統軍慕容拒率衆五千從他路夜襲龍門破之崇乃自攻靈珍靈珍連戰敗走俘其妻子崇多設疑兵襲剋武興蕭鸞梁州刺史陰廣宗遣參軍鄭猷王思考率衆援靈珍崇大破之并斬婆羅首殺千餘人俘獲猷等靈珍走奔漢中高祖在南陽覽表大悅曰使朕無

西顧之憂者李崇之功也以崇爲都督梁秦二州諸軍事本將軍梁州刺史高祖手詔曰今仇龍剋清鎮捍以德文人咸惠既宜寔允遠寄故勅受梁州用軍邊服便可善思經略去其可除安其可育公私所患悉令芟夷及靈珍偷據白水崇擊破之靈珍遠遁世宗初徵爲右衛將軍兼七兵尚書尋加撫軍將軍正尚書轉左衛將軍相州大中正魯陽蠻柳北喜魯北燕等聚衆反叛諸蠻悉應之圍逼湖陽遊擊將軍李暉先鎮此城盡力捍禦賊勢甚威詔以崇爲使持節都督征蠻諸軍事以討之蠻衆數萬屯據形要以拒官軍崇累戰破之斬北燕等徙萬餘戶於幽并諸州世宗追賞平氏之功封魏昌縣開國伯邑五百戶東荊州蠻樊安聚衆於龍山僭稱大號蕭衍共爲唇齒遣兵應之諸將擊討不利乃以崇爲使持節散騎常侍都督征蠻諸軍事進討西荊諸蠻悉降詔以崇爲使持節兼侍中東道大使黜陟能否著賞罰之稱轉中護軍出除散騎常侍征南將軍揚州刺史詔曰應敵制變算非一途救左擊右疾雷均勢今胸山蟻寇久結未殄賊衍狡詐或生詭劫宜遣銳兵備其不意崇可都督淮南諸軍事坐敦威重遙運聲算延昌初加侍中車騎將軍都督江西諸軍事刺史如故先是壽春縣人苟泰有子三歲遇賊亡失數年不知所在後見在同縣人趙奉伯家泰以狀告各言己子並有隣證郡縣不能斷崇曰此易知耳令二父與兒各在別處禁經數旬然後遣人告之曰君兒遇患向已暴死有教解禁可出奔哀也苟泰聞卽號咷悲不自勝奉伯咨嗟而已殊無痛意崇察知之乃以兒還泰詰奉伯詐狀奉伯乃款引云先亡一子故妄認之又定州流人解慶賓兄弟坐事俱徙揚州弟思安背役亡歸慶賓懼後役追責規絕名實乃認城外死尸詐稱其弟爲人所殺迎歸殯葬頗類思安見者莫辨又有女巫楊氏自云見鬼說思安被害之苦飢渴之意慶賓又誣疑同軍兵蘇顯甫李蓋等所殺經州訟之二人不勝楚毒各自款引獄將決竟崇疑而停之密遣二人非州內所識者僞從外來詣慶賓告曰僕住在此州去此三百比有一人見過寄宿夜中共語疑其有異便卽詰問述其由緒乃云是流兵背役逃走姓解字思安時欲送官苦見求

及稱有兄慶賓。今住揚州相國城內。嫂姓徐。君脫於懸。爲往報告。見申委曲。家兄聞此。必重相報。所有資財。當不愛惜。今但見寶。若往不獲。送官何晚。是故相造。指申此意。君欲見屋幾何。當放賢弟。若其不信。可見隨看之。慶賓悵然失色。求其少傳。當備財物。此人具以報崇。攝慶賓問曰。爾弟逃亡。何故妄認他尸。慶賓伏引。更問蓋等。乃云自誣。數日之間。思安亦爲人縛送。崇召女巫視之。鞭笞一百。崇斷獄精審。皆此類也。時有泉水湧於八公山頂。壽春城中。有魚無數。從地湧出。野鴨羣飛入城。與鵲爭巢。五月大霖雨。十有三日。大水入城。屋宇皆沒。崇與兵泊於城上。水增未已。乃乘船附於女牆。城不沒者二板而已。州府勸崇棄壽春。保北山。崇曰。吾受國重恩。忝守藩岳。德薄招災。致此大水。淮南萬里。繫於吾身。一旦動脚。百姓瓦解。揚州之地。恐非國物。昔王尊慷慨。義感黃河。吾豈愛一軀。取愧千載。但憐茲土庶。無辜同死。可桴筏隨高。人規自脫。吾必死守此城。幸諸君勿言。時州人裴絢等。受蕭衍假豫州刺史。因乘大水。謀欲爲亂。崇皆擊滅之。崇以洪水爲災。請罪解任。詔曰。卿居藩累年。威懷兼暢。資儲豐溢。足制勦寇。然夏雨汎濫。斯非人力。何得以此辭解。今水涸路通。公私復業。便可繕甲積糧。修復城雉。勞恤土庶。務盡綏懷之略也。崇又表請解州。詔報不聽。是時非崇。則淮南不守矣。崇沉深有將略。寬厚善御衆。在州凡經十年。常養壯士數千人。寇賊侵邊。所向摧破。號曰臥虎。賊甚憚之。蕭衍惡其久在淮南。屢設反間。無所不至。世宗雅相委重。衍無以措其姦謀。衍乃授崇車騎大將軍。開府。儀同三司。萬戶郡公。諸子皆爲縣侯。欲以擢崇。崇表言其狀。世宗屢賜璽書慰勉之。賞賜珍異。歲至五三。親待無與。爲比。衍每數息。服世宗之能任崇也。肅宗踐祚。褒賜衣馬。及蕭衍遣其遊擊將軍趙祖悅襲據西碭石。更築外城。逼徙緣淮之人於城內。又遣二將昌義之王神念率水軍沂淮而上。規取壽春。田道龍寇邊城。路長平寇五門。胡興茂寇開霍。揚州諸戍。皆被寇逼。崇分遣諸將。與之相持。密裝船艦二百餘艘。教之水戰。以待臺軍。蕭衍霍州司馬田休等。率衆寇建安。崇遣統軍李神擊走之。又命邊城戍主邵申賢要其走路。破之於濡水。俘斬三千餘人。靈太后璽書勞勉。許昌縣令兼紆麻戍主陳平玉。南引衍軍以戍。歸之。崇

自秋請援。表至十餘。詔遣鎮南將軍崔亮救碭石。鎮東將軍蕭寶寅於衍堰上流。決淮東注。朝廷以諸將乖角。不相順赴。乃以尙書李平兼石儀射持節節度之。崇遣李神乘蘭艦百餘艘。沿淮與李平崔亮合攻碭石。李神水軍。刺其東北外城。祖悅力屈。乃降。語在平傳。朝廷嘉之。進號驃騎將軍。儀同三司。刺史都督如故。衍堰未破。水勢日增。崇乃於碭石戍間。編舟爲橋。北更立船樓十。各高三丈。十步置一籬至兩岸。著板裝治。四箱解合。賊至舉用。不戰解下。又於樓船之北。連覆大船。東西竟水。防賊火機。又於八公山之東南。更起一城。以備大水。州人號曰魏昌城。崇累表解州。前後十餘上。肅宗乃以元志代之。尋除都督冀定瀛三州諸軍事。驃騎大將軍。冀州刺史。儀同如故。不行。崇上表曰。臣聞世室明堂。顯於周夏。二轡兩學。感自虞殷。所以宗配上帝。以著莫大之嚴。宣布下土。以彰則天之軌。養黃髮以詢格言。育青襟而敷典式。用能享國久長。風徽萬祀者也。故孔子稱巍巍乎其有成功。郁郁乎其有文章。此其感矣。爰暨亡秦。政失其道。坑儒滅學。以蔽黔首。國無彝序之風。野有非時之役。故九服分崩。祚終二世。炎漢勃興。更修儒術。文景已降。禮樂復興。彰化致昇平。治幾刑措。故西京有六學之美。東都有三本之感。莫不紛紛掩藹。響流無已。逮自魏晉。撥亂相因。兵革之中。學校不絕。遺文燦然。方軌前代。仰惟高祖孝文皇帝。稟聖自天。道鏡今古。徙取嵩河。光宅函洛。模唐虞以革軌儀。規周漢以新品制。列教序於鄉黨。敦詩書於郡國。使揖讓之禮。橫被於崎嶇。歌詠之音。聲溢於仄陋。但經始事殷。戎軒屢駕。未遑多就。弓劍弗追。世宗統曆。事遵先緒。永平之中。大興板築。續以水旱。戎馬生郊。雖逮爲山。還停一簣。竊惟皇遷中縣。垂二十祀。而明堂禮樂之本。乃鬱荆棘之林。膠序德義之基。空盈牧豎之跡。城隍嚴固之重。闕塹石之工。墉堞顯望之要。少樓榭之飾。加以風雨稍侵。漸致虧墜。又府寺初營。頗亦壯美。然一造至今。更不修繕。廳宇凋朽。牆垣頽壞。皆非所謂追隆堂構。儀形萬國者也。伏聞朝議。以高祖大造區夏。道侔姬文。擬祀明堂。式配上帝。今若基宇不修。仍同丘畎。即使高皇神享。闕於國陽。宗事之典。有聲無實。此臣子所以匪寧。億兆所以失望也。臣又聞官方授能。所以任事。事既任矣。酬之以祿。如此上無曠官之

讖下絕尸素之謗。今國子雖有學官之名，而無教授之實。何異兔絲燕麥，南箕北斗哉？昔劉向有言：王者宜興辟雍，陳禮樂以風化天下。夫禮樂所以養人，刑法所以殺人，而有司勤勤請定刑法，至於禮樂，則曰未敢，是則敢於殺人，不敢於養人也。臣以為當今四海清平，九服寧宴，經國要重，理應先營。脫復稽延，則劉向之言徵矣。但事不兩與，須有進退。以臣愚量，宜罷尚方雕靡之作，頗省永軍土木之功，并減瑤光材瓦之力，兼分石窟鑄琢之勞。及諸事役非急者，三時農隙，修此數條，使辟雍之禮蔚爾而復興，諷誦之音煥然而更作。美樹高墉，嚴壯於外；槐宮棘宇，顯麗於中。道發明令，重遵鄉飲，敦進郡學，精課經業。如此則元凱可得之於上序，游夏可致之於下國，豈不休歟？誠知佛理淵妙，含識所宗，然比之治要，容可小緩。苟使魏道熙緝，元首唯康，爾乃經營，未為晚也。靈太后令曰：省表具悉。體國之誠，配饗大禮，為國之本。比以戎馬在郊，未遑修繕。今四表晏寧，年和歲稔，當勅有司，別議經始。除中書監驃騎大將軍儀同如故，又授右光祿大夫，出為使持節、侍中、都督定幽燕瀛四州諸軍事、本將軍、定州刺史。儀同如故、徵拜尚書左僕射，加散騎常侍、驃騎儀同如故。還尚書令，加侍中。崇在官和厚，明於決斷，受納辭訟，必理在可推，始為下筆，不徒爾收領也。然性好財貨，販肆聚斂，家資巨萬，營求不息。子世哲為相州刺史，亦無清白狀。鄴洛市鄺收擅其利，為時論所鄙。蠕蠕主阿那瓌率眾犯塞，詔崇以本官都督北討諸軍事，以討之。崇辭於顯陽殿，戎服武飾，志氣奮揚。時年六十九，幹力如少。肅宗目而壯之，朝廷莫不稱善。崇遂出塞三千餘里，不及賊而還。後北鎮破落汗拔陵反叛，所在響應。征北將軍臨淮王彧大敗於五原，安北將軍李叔仁尋敗於白道。賊眾日甚，詔引丞相令僕尚書侍中黃門於顯陽殿，詔曰：朕比以鎮人構逆，登遣都督臨淮王剌時除翦，軍居五原，前鋒失利。二將殞命，兵士挫衄。又武川乖防，復陷凶手。恐賊勢侵淫，寇連恆朔。金陵在彼，夙夜憂惶。諸人宜陳良策，以副朕懷。吏部尚書元脩義曰：彊寇充斥，事須得討。臣謂須得重貴鎮壓恆朔，總彼師旅，備衛金陵。詔曰：去歲阿那瓌叛逆，遣李崇令北征，崇遂長驅塞北，返旆榆關。此亦一時之盛業。乃上表求改鎮為州，罷削舊實。朕于時以舊典難革，

不許其請。尋李崇此表，開諸鎮非異之心，致有今日之事。但既往難追，為復略論此耳。朕以李崇國威望重，器識英斷，意欲還遣崇行。總督三軍，揚旌恆朔，除彼羣盜，諸人謂可。爾以不僕射蕭寶夤等曰：陛下以舊都在北，憂慮金陵臣等實懷悚息。李崇德位隆重，社稷之臣，陛下此遣，實合羣望。崇啓曰：臣實無用，猥蒙殊寵，位妨賢路，遂充北伐，徒勞將士，無勳而還，慙負聖朝。於今莫已。臣以六鎮幽垂，與賊接對，鳴柝聲，弗離旬朔。州名差重，於鎮謂實可悅。彼心使聲教日揚，微塵去塞，豈敢專此凶源，開生賊意？臣之愆負，死有餘責。屬陛下慈寬，賜全腰領，今更遣臣北行，正是報恩改過，所不敢辭。但臣年七十，自惟老疾，不堪敵場。更願英賢收功威日。於是詔崇以本官加使持節，開府，北討大都督、撫軍將軍崔暹鎮軍將軍廣陵王淵，皆受崇節度。又詔崇子光祿大夫神軌假平北將軍，隨崇北討。崇至五原，崔暹大敗于白道之北。賊遂并力攻崇，崇與廣陵王淵力戰，累破賊眾，相持至冬。乃引還平城。淵表崇長史祖瑩詐增功級，盜沒軍資。崇坐免官爵，徵還。以後事付淵。後徐州刺史元法僧以彭城南叛，時除安樂王鑒為徐州刺史，以討法僧。為法僧所敗，單馬奔歸。乃詔復崇官爵。為徐州大都督，節度諸軍事。會崇疾篤，乃以衛將軍安豐王延明代之。除改開府相州刺史。侍中將軍儀同並如故。孝昌元年薨於位。時年七十一。贈侍中、驃騎大將軍、司徒公、雍州刺史。諡曰武康。後重贈太尉公，增邑一千戶。餘如故。長子世哲，性輕率，供奉豪侈，少經征役，頗有將用。自司徒中兵參軍，超為征虜將軍，驍騎將軍。尋遷後將軍，為三關別將，討羣蠻大破之。斬蕭衍龍驤將軍文思之等，還拜鴻臚少卿。性傾巧，善事人，亦以貨賂自達。高肇劉騰之處勢也，皆與親善。故世號為李錐。肅宗末，遷宗正卿，加平南將軍，轉大司農卿。仍本將軍，又改授太僕卿，加鎮東將軍。尋出為相州刺史。將軍如故。世哲至州，斥逐細人，遷徙佛寺，逼買其地，廣置第宅。百姓患之。崇北征之後，徵兼太常卿，御史高道穆毀發其宅，表其罪過。後除鎮西將軍，涇州刺史，賜爵衛國子。正光五年七月卒，賜帛五百疋。朝服一襲，贈散騎常侍，衛將軍，吏部尚書，冀州刺史。子如故，世哲弟神軌，受父爵陳留侯，自給事中稍遷員外常侍。光祿大夫，累出征討，頗

有將領之氣孝昌中爲靈太后寵遇勢傾朝野時云見幸帷幄與鄭儼爲雙時人莫能明也頻遷征東將軍武衛將軍給事黃門侍郎常領中書舍人時相州刺史安樂王鑒據州反詔神軌與都督源子邕等討平之武泰初蠻帥李洪扇動諸落伊闕已東至於鞏縣多被燒劫詔神軌爲都督破平之朱榮之向洛也復爲大都督率衆禦之出至河橋值北中不守遂便退還尋與百官候駕於河陰仍遇害焉建義初贈侍中驃騎大將軍司空公相州刺史諡曰烈

崔亮字敬儒清河東武城人也父元孫劉駿尚書郎劉彧之僭立也或青州刺史沈文秀阻兵叛之或使元孫討文秀爲文秀所害亮母房氏攜亮依冀州刺史崔道固於歷城道固卽亮之叔祖也及慕容白曜之平三齊內徙桑乾爲平齊民時年十歲常依季父幼孫居家貧傭書自業時隴西李冲當朝任事亮從兄光往依之謂亮曰安能久事筆硯而不往託李氏也彼家饒書因可得學亮曰弟妹飢寒豈可獨飽自可觀書於市安能看人眉睫乎光言之於冲冲召亮與語因謂亮曰比見卿先人相命論使人胸中無復怵迫之念今遂亡本卿能記之不亮卽爲誦之涕淚交零聲韻不異冲甚奇之迎爲館客冲謂其兄子彥曰大崔生寬和篤雅汝宜友之小崔生峭整清徹汝宜敬之二人終將大至冲薦之爲中書博士轉議郎尋遷尚書二千石郎高祖在洛欲創革舊制選置百官謂羣臣曰與朕舉一吏部郎必使才望兼尤者給卿三日假又一日高祖曰朕已得之不煩卿輩也馳驛徵亮兼吏部郎俄爲太子中舍人選中書侍郎兼尚書左丞亮雖歷顯任其妻不免親事春殿高祖聞之嘉其清貧詔帶野王令世宗親政遷給事黃門侍郎仍兼吏部郎領青州大中正亮自參選事垂將十年廉慎明決爲尚書郭柙所委每云非崔郎中選事不辦尋除散騎常侍仍爲黃門遷度支尚書領御史中尉自遷都之後經略四方又營洛邑費用甚廣亮在度支別立條格歲省億計又議修汴蔡二渠以通邊運公私賴焉侍中廣平王懷以母弟之親左右不遵憲法勅亮推治世宗禁懷不通賓客者久之後因宴集懷恃親使忿欲陵突亮亮乃正色責之卽起於世宗前脫冠請罪遂拜辭欲出世宗曰廣平驕疎向來又醉卿之所悉何乃如此也遂詔亮復坐令懷謝

焉亮外雖方正內亦承候時情宣傳左右郭神安頗被世宗識遇以弟託亮亮引爲御史及神安敗後因集禁中世宗令兼侍中盧昶宣旨責亮曰在法官何故受左右囑讀亮拜謝而已無以上對轉都官尚書又轉七兵領廷尉卿如散騎常侍中正如故徐州刺史元昞撫御失和詔亮馳驛安撫亮至劾昞處以大辟勞費經慰百姓怙然除安西將軍雍州刺史城北渭水淺不通船行人艱阻亮謂寮佐曰昔杜預乃造河梁況此有異長河且魏晉之日亦自有橋吾今決欲營之咸曰水淺不可爲浮橋汎長無恆又不可施柱恐難成立亮曰昔秦居咸陽橫橋渡渭以像閣道此卽以柱爲橋今唯慮長柱不可得耳會天大雨山水暴至浮出長木數百根藉此爲用橋遂成立百姓利之至今猶名崔公橋亮性公清敏于斷決所在並號稱職三輔服其德政世宗嘉之詔賜衣馬被褥後納其女爲九嬪徵爲太常卿攝吏部事肅宗初出爲撫軍將軍定州刺史蕭衍左遊擊將軍趙祖悅率衆偷據破石詔亮假鎮南將軍齊王蕭寶夤鎮東將軍章武王融安南將軍並使持節都督諸軍事以討之靈太后勞遣亮等賜戎服雜物亮至破石祖悅出城逆戰大破之賊復於城外置二柵欲拒官軍亮焚擊破之殺三千餘人亮與李崇爲水陸之期日進攻而崇不至及李平至崇乃進軍共平破石語在平傳靈太后賜亮璽書曰破石既平大勢全舉淮堰孤危自將奔遁若仍敢遊魂此當易以立計擒翦蟻徒應在旦夕將軍推轂所憑親對其事處分經略宜共協齊必令得掃盪之理盡彼遺燼也隨使守禦及分度掠截扼其咽喉防塞走路期之全獲無令漏逸若畏威降首者自加燭宥以仁爲本任之雅算一二往使別宣以功進號鎮北將軍李平部分諸軍將水陸兼進以討堰賊亮違平節度以疾請還隨表而發平表曰臣以蕭衍將湛僧珍田道龍遊魂境內猶未收跡義之神念尙住梁城令都督崔亮權據下蔡別將袁生卽住東岸與亮接勢以防橋道臣發引向堰舍人曹道至奉勅更有處分而亮已輒還京按亮受付東南推轂是託誠應憂國忘家致命爲限而始居汝陰盤桓不進譬到寇所停淹八旬所營土山攻道並不克就捐費糧力坐延歲序賴天威遠被士卒憤激東北騰上垂至北門而亮遲回仍不肯上臣逼以白刃

甫乃登陟及平硤石宜聽處分方更肆其專恣輕輒還歸此而不糾法將焉寄按律臨軍征討而故留不赴者死又云軍還先歸者流軍罷先還尚有流坐況亮被符令停委棄而反失乘勝之機關水陸之會緣情據理咎深故留今處亮死上議靈太后令曰亮爲臣不忠去留自擅既損威稜違我經略雖有小捷豈免大咎但吾攝御萬幾庶茲惡殺可特聽以功補過及平至亮與爭功於禁中形於聲色尋除殿中尚書遷吏部尚書時羽林新害張彝之後靈太后令武官得依資入選官員既少應選者多前尚書李昭循常擢人百姓大爲嗟怨亮乃奏爲格制不問士之賢愚專以停解日月爲斷雖復官須此人停日後者終於不得庸才下品年月久者灼然先用沉滯者皆稱其能亮外甥司空諮議劉景安書規亮曰殷周以鄉塾貢士兩漢由州郡薦才魏晉因循又置中正諦觀在昔莫不審舉雖未盡美足應十收六七而朝廷貢才止求其文不取其理察孝廉唯論章句不及治道立中正不考人才行業空辨姓氏姓高下至於取士之途不溥沙汰之理未精而舅屬當銓衡宜須改張易調如之何反爲停年格以限之天下士子誰復修厲名行哉亮答書曰汝所言乃有深致吾乘時邀幸得爲吏部尚書當其壯也尚不如人況今朽老而居帝難之任常思同升舉直以報明主之恩盡忠竭力不爲貽厥之累昨爲此格有由而然今已爲汝所怪千載之後誰知我哉可靜念吾言當爲汝論之吾兼正六爲吏部郎三爲尚書銓衡所宜頗知之矣但古今不同時宜須異何者昔有中正品其才第上之尚書尚書據狀量人授職此乃與天下羣賢共爵人也吾謂當爾之時無遺才無濫舉矣而汝猶云十收六七況今日之選專歸尚書以一人之鑒照察天下劉毅所云一吏部兩郎中而欲究竟人物何異以管闕天而求其博哉今勳人甚多又羽林入選武夫崛起不解書計唯可礦弩前驅指蹤捕噬而已忽令垂組乘軒求其烹鮮之效未曾操刀而使專割又武人至多官員至少不可周溥設令十人共一官猶無官可授況一人望一官何由可不怨哉吾近面執不宜使武人入選請賜其爵厚其祿既不見從是以權立此格限以停年耳昔子產鑄刑書以救弊叔向譏之以正法何異汝以古禮難權宜哉仲尼云德我者亦春秋罪

我者亦春秋吾之此指其由是也但令當來君子知吾意焉後甄琛元修義城陽王徽相繼爲吏部尚書利其便已踵而行之自是賢愚同貫涇渭無別魏之失才從亮始也轉侍中太常卿尋遷左光祿大夫尚書右僕射時劉騰擅權亮託妻劉氏傾身事之故頻年之中各位隆赫有識者譏之轉尚書僕射加散騎常侍正光二年秋疽發於背肅宗遣舍人問疾亮上表乞解僕射送所負荷及印綬詔不許尋卒詔給東園祕器朝服一襲贈物七百段蠟三百斤贈使持節散騎常侍車騎大將軍儀同三司冀州刺史諡曰貞烈亮在雍州讀杜預傳見爲八磨嘉其有濟時用遂教民爲礮及爲僕射奏於張方橋東堰數水造水礮磨數十區其利十倍國用便之亮有三子士安士和士泰並彊幹等於當世士安歷尚書比部郎卒於諫議大夫贈左將軍光州刺史無子弟士和以子乾亨繼

乾亨定武中尚書都兵郎中

士和歷司空主簿通直郎從亮征硤石以軍勳拜冠軍將軍中散大夫西道行臺元脩義左丞行涇州事蕭寶夤之在關中高選寮佐以爲督府長史時莫折念生遣使詐降寶夤表士和兼度支尚書爲隴右行臺令人秦撫慰爲念生所害

士泰歷給事中司空從事中郎諫議大夫司空司馬肅宗末荆蠻侵斥以士泰爲龍驤將軍征蠻別將事平以功賜爵五等男建義初遇害於河陰贈都督青兗二州諸軍事鎮東將軍青州刺史諡曰文肅

子肇師襲爵武定末中書舍人

亮弟敬默奉朝請卒於征虜長史贈南陽太守子思韶從亮征硤石以軍功賜爵武城子爲冀州別駕

敬默弟隱處青州州都亮以其賤出殊不經紀論者譏焉

亮從父弟光韶事親以孝聞初除奉朝請光韶與弟光伯雙生操業相侔特相友愛遂經吏部尚書李冲讓官於光伯辭色懇至冲爲奏聞高祖嘉而許之太和二十年以光韶爲司空行參軍復請讓從叔和曰臣誠微賤未登讓品屬逢

皇朝恥無讓德和亦謙退辭而不當高祖善之遂以和爲廣陵王國常侍尋勅光詔兼祕書郎掌校華林御書肅宗初除青州治中後爲司空騎兵參軍又兼司徒戶曹出爲濟州輔國府司馬刺史高植甚知之政事多委訪焉遷青州平東府長史府解勅知州事光詔清直明斷民吏畏愛之人爲司空從事中郎以母老解官歸養賦詩展意朝士屬和者數十人久之徵爲司徒諮議固辭不拜光詔性嚴毅聲韻抗烈與人平談常若震厲至於兄弟議論外間謂爲忿怒然孔懷雅睦人少逮之孝莊初河間邢杲率河北流民十餘萬聚攻逼州郡刺史元傳憂不自安州人乞光詔爲長史以鎮之時陽平路回寓居齊土與杲潛相影響引賊入郭光詔臨機處分在難確然賊退之後刺史表光詔忠毅朝廷嘉之發使慰勞焉尋爲東道軍司及元顥入洛自河以南莫不風靡而刺史廣陵王欣集文武以議所從欣曰北海長樂俱是同堂兄弟今宗祧不移我欲受赦諸君意各何如在坐之人莫不失色光詔獨抗言曰元顥受制梁國稱兵本朝拔本塞源以資讎敵賊臣亂子曠代少儔何但大王家事所宜切齒等荷朝眷未敢仰從長史崔景茂前瀛州刺史張烈前鄆州刺史房叔祖徵士張僧皓咸云軍司議是欣乃斬類使尋徵輔國將軍廷尉少卿未至除太尉長史加左將軍俄遷廷尉卿時祕書監祖瑩以賊罪被劾光詔必欲致之重法太尉陽城王徽尙書令臨淮王彧吏部尙書李神儔侍中李彧並勢望當時皆爲瑩求寬光詔正色曰朝賢執事於舜之功未聞有一如何反爲罪人言乎其執意不回如此永安末擾亂之際遂還鄉里光詔博學彊辯尤好理論至於人倫名教得失之間推而論之不以一毫假物家足於財而性儉吝衣馬敝瘦食味麤薄始光詔在都同里人王蔓於夜遇盜害其二子孝莊詔黃門高道穆令加檢捕一坊之內家別搜索至光詔宅綾絹錢布置篋充積議者譏其矯蓄其家資產皆光伯所營光伯亡悉焚其契河間邢子才曾貸錢數萬後送還之光詔曰此亡弟相貸僕不知也竟不納刺史元弼前妻是光詔之繼室兄女而弼貪怙多諸不法光詔以親情亟相非責弼銜之時耿翔反於州界弼誣光詔子通與賊連結囚其合家考掠非理而光詔與之辯爭辭色不屈會樊子鵠爲東道大使知其

見枉理出之時人勸令詣樊陳謝光詔曰羊舌大夫已有成事何勞往也子鵠亦數尙之後刺史侯淵代下疑懼停軍益都謀爲不軌令數百騎夜入南郭劫光詔以兵脅之責以謀略光詔曰凡起兵者須有名義使君今日舉動直是作賊耳父老知復何計淵雖恨之敬而不敢害尋除征東將軍金紫光祿大夫不起光詔以世道屯遼朝廷屢變閉門却掃吉凶斷絕誠子孫曰吾自謂立身無愆古烈但以祿命有限無容希世取進在官以來不冒一級官雖不達經爲九卿且吾平生素業足以遺汝官闕亦何足言也吾既運薄便經三娶而汝之兄弟各不同生合葬非古吾百年之後不須合也然贈諡之及出自君恩豈容子孫自求之也勿須求贈若違吾志如有神靈不享汝祀吾兄弟自幼及老衣服飲食未曾一片不同至於兒女官婚榮利之事未嘗不先以推弟弟頃橫禍權作松櫬亦可爲吾作松棺使吾見之卒年七十一孝靜初侍中賈思同申啓稱述光詔贈散騎常侍驃騎將軍青州刺史

光詔弟光伯尙書郎青州別駕後以族弟休臨州遂申牒求解尙書奏按禮始封之君不臣諸父昆弟封君之子臣昆弟不臣諸父封君之孫得盡臣計始封之君卽是世繼之祖尙不得臣況今之刺史既非世繼而得行臣吏之節執笏稱名者乎檢光伯請解率禮不愆請宜許遂以明道教靈太后令從之尋除北海太守有司以其更滿依例奏代肅宗詔曰光伯自莅海沂清風遠著兼其兄光詔復能辭榮侍養兄弟忠孝宜有甄錄可更申三年以厲風化後歷太傅諮議參軍前廢帝時崔祖孺張僧皓起逆攻東陽旬日之間衆十餘萬刺史東萊王貴平欲令光伯出城慰勞兄光詔曰城民陵縱爲日久人人恨之其氣甚盛古人有言衆怒如水火焉以此觀之今日非可慰諭止也貴平彊之光詔曰使君受委一方重攝萬里而經略大事不與國士圖之所共腹心皆趨走羣小既不能綏遏以杜其萌又不能坐觀待其衰挫蹙迫小弟從爲無名之行若單騎獨往或見拘繫若以衆臨之勢必相拒敵懸見無益也貴平逼之不得已光伯遂出城數里城民以光伯兄弟羣情所繫慮人劫留防衛者衆外人疑其欲戰未及曉論爲飛矢所中卒贈征東將軍青州刺史

子澄武定末殷州別駕

史臣曰李崇以風質英重毅然秀立任當將相望高朝野美矣崔亮既明達後事動有名迹於斷年之選失之逾遠救弊未聞終爲國蠹無所苟而已其若是乎光韶居雅仗正有國士之風矣

魏書卷六十六

魏書卷六十六考證

李崇傳崇上表○臣人龍按崇此表北史作邢邵所上其文大同小異

魏書卷六十六考證

齊

魏

收

撰

列傳第五十五

崔光

崔光本名孝伯字長仁高祖賜名焉東清河鄆人也祖曠從慕容德南渡河居青州之時慕容氏滅仕劉義隆爲樂陵太守父靈延劉駿龍驤將軍長廣太守與劉或冀州刺史崔道固共拒國軍慕容白曜之平三齊光年十七隨父徙代家貧好學晝耕夜誦傭書以養父母太和六年拜中書博士轉著作郎與秘書丞李彪參撰國書遷中書侍郎給事黃門侍郎甚爲高祖所知待常曰孝伯之才浩浩如黃河東注固今日之文宗也以參贊遷都之謀賜爵朝陽子拜散騎常侍黃門著作如故又兼太子少傅尋以本官兼侍中使持節爲陝西大使巡方省察所經述敘古事因而賦詩三十八篇還仍兼侍中以謀謨之功進爵爲伯光少有度喜怒不見於色有毀惡之者必善言以報之雖見誣謗終不自申曲直皇與初有同郡二人並被掠爲奴婢後詣光求哀光乃以二口贖免高祖聞而嘉之雖處機近曾不留心文案唯從容論議參贊大政而已高祖每對羣臣曰以崔光之高才大量若無意外咎譴二十年後當作司空其見重如是又從駕破陳顯達世宗卽位正除侍中初光與李彪共撰國書太和之末彪解著作專以史事任光彪尋以罪廢世宗居諒闇彪上表求成魏書詔許之彪遂以白衣於祕書省著述光雖領史官以彪意在專功表解侍中著作以讓彪世宗不許遷太常卿領齊州大中正正始元年夏有典事史元顯獻四足翼雞詔散騎侍郎趙邕以問光光表答曰臣謹按漢書五行志宣帝黃龍元年未央殿路軫中雌雞化爲雄毛變而不鳴不將無距元帝初元中丞相府史家雌雞伏子漸化爲雄冠距鳴將永光中有獻雄雞生角劉向以爲難者小畜主司時起居小臣執事爲政之象也言小臣將乘君之威以害政事指石顯也竟寧元年石顯伏辜此其效也靈帝光和元年南宮寺雌雞欲化爲雄一身毛皆似雄但頭冠尙未變詔以問議郎蔡邕邕對曰貌之不恭則有難禍臣竊推之頭

爲元首人君之象也今雞一身已變未至於頭而上知之是將有其事而不遂成之象也若應之不精政無所改頭冠或成爲患滋大是後張角作亂稱黃巾賊遂破壞四方疲於賦役民多叛者上不改政遂至天下大亂今之雞狀雖與漢不同而其應頗相類矣向邕並博達之士考物驗事信而有證誠可畏也臣以邕言推之翅足衆多亦羣下相扇助之象雖而未大脚羽差小亦其勢尙微易制御也臣聞災異之見皆所以示吉凶明君觀之而懼乃能招福闇主視之彌慢所用致禍詩書春秋秦漢之事多矣此陛下所觀者也今或有自賤而貴關預政事殆亦前代君房之匹比者南境死亡千計白骨橫野存有酷恨之痛歿爲怨傷之魂義陽屯師盛夏未返荆蠻狡猾征人淹次東州轉輸往多無還百姓困窮絞縊以殞北方霜降蠶婦輟事羣生憔悴莫甚於今此亦賈誼哭數谷永切諫之時司寇行戮君爲之不舉陛下爲民父母所宜矜恤國重戎戰用兵猶火內外怨敵易以亂離陛下縱欲忽天下豈不仰念太祖取之艱難先帝經營劬勞也誠願陛下留聰明之鑒警天地之意禮處左右節其責越往者鄧通董賢之盛愛之正所以害之又躬饗加罕宴宗或闕時應親肅郊廟延敬諸父檢訪四方務加休息爰發慈旨撫賑貧瘼簡費山地減撤聲歎畫存政道夜以安身博采芻蕘進賢黜佞則兆庶幸甚妖珥慶進禎祥集矣世宗覽之大悅後數日而茹皓等並以罪失伏法於是禮光愈重加撫軍將軍二年八月光表曰去二十八日有物出於太極之西序勅以示臣臣按其形卽莊子所謂蒸成菌者也又云朝菌不終晦朔雍門周所稱磨蕭斧而伐朝菌皆指言蒸氣鬱長非有根種柔脆之質凋頹速易不延旬月無擬斧斤又多生墟落穢濕之地罕起殿堂高華之所今極宇崇麗牆築工密糞朽弗加沾濡不及而茲菌歟構殿狀扶疎誠足異也夫野木生朝野鳥入廟古人以爲敗亡之象然懼災修德者咸致休慶所謂家利而怪先國與而妖豫是故桑穀拱庭太戊以昌雉集鼎武丁用熙自比鷦鷯巢於廟殿梟鳴於宮寢菌生賓階軒坐之正準諸往記信可爲誡且東南未靜兵革不息郊甸之內大旱跨時民勞物悴莫此之甚承天子育者所宜矜恤伏願陛下追殷二宗感變之意側躬聳誠惟新聖道節夜

飲之忻。彊御之膳。養方富之年。保金玉之性。則魏祚可以永隆。皇壽等於山岳。四年秋。除中書令。進號鎮東將軍。永平元年秋。將刑元愉妾李氏。羣官無敢言者。勅光爲詔。光遂巡不作。奏曰。伏聞當刑元愉妾李。加之屠割。妖惑扇亂。誠合此罪。但外人竊云。李今懷妊。例待分產。且臣尋諸舊典。兼推近事。戮至刳胎。謂之虐刑。桀紂之主。乃行斯事。君舉必書。義無隱昧。酷而非法。何以示後。陛下春秋已長。未有儲體。皇子襁褓。至有夭失。臣之愚識。知無不言。乞停李獄。以俟育孕。世宗納之。延昌元年春。遷中書監。侍中如故。二年。世宗幸東宮。召光與黃門甄琛。廣陽王淵等。並賜坐。詔光曰。卿是朕西臺大臣。今當爲太子師傅。光起拜固辭。詔不許。卽命肅宗出。從者十餘人。勅以光爲傳之意。令肅宗拜光。光又拜辭。不當受太子拜。復不蒙許。肅宗遂南面再拜。詹事王顯啓請從太子拜。於是宮臣畢拜。光北面立。不敢答拜。唯西面拜謝而出。於是賜光繡綵一百匹。琛淵等各差。尋授太子少傅。三年。遷右光祿大夫。侍中監如故。四年正月。世宗夜崩。光與侍中領軍將軍于忠。迎肅宗於東宮。安撫內外。光有力焉。帝崩後二日。廣平王懷扶疾入臨。以母弟之親。徑至太極西廡。哀慟禁內。呼侍中黃門領軍二衛云。身欲上殿哭大行。又須入見主上。諸人皆愕然。相視無敢抗對者。光獨攘袂振杖。引漢光武初崩。太尉趙憙橫劍當階。推下親王故事。辭色甚厲。聞者莫不稱善。壯光理義有據。懷聲淚俱止。云侍中以古事裁我。我不敢不服。於是遂還。頻遣左右致謝。初。永平四年。以黃門郎孫惠蔚代光領著作。惠蔚首尾五載。無所厝意。至是三月。尙書令任城王澄表。光宜還史任。於是詔光還領著作。四月。遷特進。五月。以奉迎肅宗之功。封光博平縣開國公。食邑二千戶。七月。領國子祭酒。八月。詔光乘步挽於雲龍門出入。尋遷車騎大將軍。儀同三司。靈太后臨朝之後。光累表遜位。于忠擅權。光依附之。及忠稍被疎黜。光并送章綴冠服茅土。表至十餘上。靈太后優答不許。有司奏追于忠及光封邑。照平元年二月。太師高陽王雍等。奏舉光授肅宗經。初。光有德於靈太后。語在于忠傳。四月。更封光平恩縣開國侯。食邑一千戶。以朝陽伯轉授第二子勗。其月勑賜羊車一乘。時靈太后臨朝。每於後園親執弓矢。光乃表上中古婦人文章。因以致

諫曰。孔子云。士志於道。據於德。依於仁。游於藝。藝謂禮樂書數射御。明前四業。丈夫婦人所同修者。若射御。唯主男子。事不及女。古之賢妃烈媛。母儀家國。垂訓四海。宣教九宗。可秉道懷疑。率遵仁禮。是以漢后馬鄧。衛邁祖考。羊嬪蔡氏。具體伯喈。伏惟皇太后舍聖履仁。臨朝闡化。肅雍雅懷。愷悌齊穆。孝祀通於神明。和風溢于區宇。因時暇豫。清暑林園。遠眺姑射。眷言豐相。弦矢所發。必中正鵠。威靈遐暢。義震上下。文武懾心。左右悅目。吾王不遊。吾何以休。不親重勿安。見富美。人情沖謙。動容祇愧。以爲舉非盡纖。事存無功。豈謂應乾順民。裁成輔相者哉。臣不勝慶幸。謹上婦人文章錄一帙。其集具在內。伏願以時披覽。仰裨未聞。惠轡挾之勞。納閑拱之泰。願精養壽。棲神翰林。是秋靈太后頻幸王公第宅。光表諫曰。禮記云。諸侯非問疾弔喪。而入諸臣之家。是謂君臣爲讎。不言王后夫人明無適臣家之義。夫人父母在。有時歸寧。親沒。使卿大夫聘。春秋紀陳宋齊之女。並爲周王后。無適本國之事。是制深於士大夫。許嫁唁兄。又義不得衛女思歸。以禮自抑。載馳竹竿。所爲作也。漢上官皇后將廢昌邑。霍光外租也。親爲宰輔。后猶御武帷。以接羣臣。示男女之別。國之大節。伯姬待姆。安就炎燎。樊姜侯命。忍赴洪流。傳皆綴集。以垂來詠。昨軒駕頻出。幸馮珉君任城王第。雖漸中秋。餘熱尙蒸。衡蓋往還。聖躬煩倦。豐廚嘉醴。罄竭時羞。上壽弗限一觴。方丈甘醕百品。旦及日斜。接對不憩。非謂順時而遊。奉養有度。縱雲輦崇涼。御筵安暢。左右僕侍。衆過千百。扶衛跋涉。袍鉀在身。蒙曝塵日。渙汗流離。致時飢渴。餐飯不贍。實馬假乘。交費錢帛。昔人稱陛下甚樂。臣等至苦。或其事也。伏惟皇太后月靈炳曜。坤儀挺茂。誕育帝躬。維興魏道。德踰文母。仁遠和意。親以天至。遠異莫聞。愛由真固。非侯虛隆。紆屈鑾駕。降臨闔里。榮光帝京。士女藻悅。白首之畫。欣遇穠年。青衿之童。慶屬唐日。千載之所難。一朝之爲易。非至明超古。忘驕釋吝。孰能若斯者哉。魏元以來。莫正斯美。與居出入。自當坦然。豈同往嫌。曲有矯避。但帝族方衍。勳貴增遷。祇請遂多。將成彝式。陛下遵酌前王。貽厥後矩。天下爲公。億兆已任。事薦郊廟。止決大政。輔養神和。簡息遊幸。以德爲車。以樂爲御。考仁聖之風。習治國之道。則率土屬賴。含生仰悅矣。臣過。荷恩榮。所知必

盡嘿嘿唯唯，愚竊未敢輕陳狂瞽，分貽憲坐，神龜元年夏，光表曰：詩稱蔽芾甘棠，勿剪勿伐，召伯所茇。又云：雖無老成人，尚有典刑。傳曰：思其人猶愛其樹。況用其道，不恤其人，是以書始稽古，易本山火，觀於天文以察時變，觀於人文以化成天下。孟子謂實匡張訓說，安世記篋於汾南，伯山抱卷於河右，元始孤論，充漢帝之坐，孟皇片字，懸魏王之帳，前哲之寶重墳籍，珍愛分篆，猶若此之至也。矧迺聖典鴻經，炳勒金石，理爲國楷，義成家範，迹實世模，事則人軌，千載之格言，百王之盛烈，而令焚荒汙毀，積榛棘而弗掃，爲鼯鼯之所栖宿，童豎之所登踞者，哉！誠可爲痛心疾首，拊膺扼腕，伏惟皇帝陛下，孝敬日休，自天縱睿，垂心初學，儒業方熙，皇太后欽明慈淑，臨制統化，崇道重教，留神翰林，將披雲臺而問禮，拂麟閣以招賢，誠宜遠開闕里，清彼孔堂，而使近在城闕，面接宮廟，舊校爲墟，子衿永替，豈所謂建國君民，教學爲先，京邑翼翼，四方是則也？尋石經之作，起自炎劉，繼以曹氏，典論初乃三百餘載，計未向二十紀矣。昔來雖屢經戎亂，猶未大崩，如聞往者，刺史臨州，多構圖寺，道俗諸用，稍有發掘，基跡泥灰，或出於此，皇都始遷，尚可補復，軍國務殷，遂不存檢，官私顯隱，漸加剝撤，播麥納菽，秋春相因，謂生蒿杞，時致火燎，由是經石彌滅，文字增缺，職忝曹教，參掌經訓，不能繕修，頽墜與復生業，倍深慙恥，今求遺國子博士一人，堪任幹事者，專主周視，驅禁田牧，制其踐穢，料閱碑牒，所失次第，量厥補綴，詔曰：此乃學者之根源，不朽之永格，垂範將來，憲章之本，便可一依公表，光乃令國子博士李郁，與助教韓神固、劉燮等，勘校石經，其殘缺者，計料石功，并字多少，欲補治之。於後靈太后廢，遂寢，二年八月，靈太后幸永寧寺，躬登九層佛圖，光表諫曰：伏見親昇上級，佇蹕表刹之下，祇心圖構，誠爲福善，聖躬玉趾，非所踐陟，臣庶恒惶，竊謂未可，按禮記：爲人子者，不登高，不臨深，古賢有言：策畫失於廟堂，大人蹶於中野。漢書上欲西馳，下峻坂，哀益攬轡，停輿曰：臣聞千金之子，不垂堂，百金之子，不倚衡，如有車敗馬驚，奈高廟太后何？又云：上耐祭廟出，欲御樓船，薛廣德免冠頓首曰：宜從橋，陛下不聽。臣以血汗車輪，樂正子春曾參弟子，亦稱至孝，固自謹慎，堂基不過一尺，猶有傷足之愧，永寧累級，閣道回隘，以柔

懦之寶體，乘至峻之重峭，萬一差跌，千悔何追？禮將祭宗廟，必散齋七日，致齋三日，然後入祀神明，可得而通，今雖容像未建，已爲神明之宅，方如雕繡，飾麗丹青，人心所祇，銳觀滋甚，登者既衆，異懷若面，縱一人之身，恆盡誠潔，豈左右闕妾，各竭虔仰，不可獨昇，必有扈侍，懼或忘慎，非飲酒茹葷而已，昨風霾暴興，紅塵四塞，白日晝昏，特可驚畏，春秋宋衛陳鄭，同日而災，伯姬待姆，致焚如之禍，去皇輿中，青州七級，亦號崇壯，夜爲上火所焚，雖梓慎裨竈之明，尙不能逆刺端兆，變起倉卒，預備不虞，天道幽遠，自昔深誠，墟墓必哀，廟社致敬，望望慄慄，入門望懷，適墓不登，龍未有昇陟之事，傳云：公既視朔，遂登觀臺，其下無天地先祖之神，故可得而乘也。內經寶塔高華，堪室千萬，唯感言香花禮拜，豈有登上之義，獨稱三寶階，從上而下，人天交接，兩得相見，超世奇絕，莫可而擬，恭敬拜跪，悉在下級，遠存瞻眺，周見山河，因其所瞻，增發嬉笑，未能級級加虔，步步崇慎，徒使京邑士女，公私湊集，上行下從，理勢以然，迄於無窮，豈長世競慕一登而可抑斷哉？蓋心信爲本，形敬乃末，重寶輕塔，增寢躁君，恭己正南面者，豈月乘峻極，旬御層階，今經始既就，子來自勸，基構已興，雕綉漸起，紫山華臺，卽其宮也，伏願息躬親之勞，廣風靡之化，因立制防，班之條限，以遏葛汙，永歸清寂，下竭肅穆之誠，上展瞻仰之敬，勿踐勿履，顯億億齡，融教闡悟，不其博敷九月，靈太后幸嵩高，光上表諫曰：伏聞明后當親幸嵩高，往還累宿，鑾遊近甸，存省民物，誠足爲善，雖漸農隙，所獲棲畝，飢貧之家，指爲珠玉，遺秉滯穢，莫不寶惜，步騎萬餘，來去經蹕，駕輦雜遝，競驚交馳，縱加禁護，猶有侵耗，士女老幼，微足傷心，秋末久旱，塵壤委深，風霾一起，紅埃四塞，輻輳峭峻，山路危狹，聖駕清道，當務萬安，乘履潤壑，蒙犯霜露，出入半旬，途越數百，飄曝彌日，仰虧和豫，七廟上靈，容或未許，億兆下心，寔用悚慄，且藏轡節，還昆蟲布列，蟻蟻之類，盈於川原，車馬騷踏，必有類殺，慈矜好生，應垂未測，誠恐悠悠之議，將謂爲福與罪，廝役困於負擔，爪牙窘於賃乘，供頓候迎，公私擾費，廚兵幕士，衣履敗穿，晝喧夜淒，罔所覆藉，監師驅捶，泣呼相望，霜旱爲災，所在不稔，饑饉薦臻，方成儉敵，爲民父母，所宜存恤，增以撫之，猶懼離散，乃於收斂，初辰，致此行舉，自近及

遠交與想嗟伏願遠覽虞舜恭己無爲近遵老易不出戶牖罷勞形之遊息傷財之驚動循典防納諸軌儀委司責成寄之耳目人神幸甚朝野抃悅靈太后不從正光元年冬賜光几杖衣服二年春肅宗親釋奠國學光執經南面百寮陪列司徒京兆王繼頻上表以位讓光夏四月以光爲司徒侍中國子祭酒領著作如故光表固辭歷年終不肯受八月獲禿鶯鳥於宮內詔以示光光表曰蒙示十四日所得大鳥此卽詩所謂有鶯在梁解云禿鶯也貪惡之鳥野澤所育不應入殿庭昔魏氏黃初中有鶻鵠集于靈芝池文帝下詔以曹恭公遠君子近小人博求賢俊太尉華歆由此遜位而讓管寧者也臣聞野物入舍古人以爲不善是以張珩惡鵠賈誼忌鵠鶻鵠整集而去前王猶爲至誠況今親入宮禁爲人所獲方被畜養晏然不以爲懼準諸往義信有殊矣且鶻鶯之禽必資魚肉菽麥稻粱時或餐啄一食之費容過斤鎰今春夏陽早穀糴稍貴窮窘之家時有菜色陛下爲民父母撫之如傷豈可棄人養鳥留意於醜形惡聲哉衛侯好鶴曹伯愛鴈身死國滅可爲寒心陛下學通春秋親覽前事何得口詠其言行違其道誠願遠師殷宗近法魏祖修德延賢消災集慶放無用之物委之川澤取樂琴書頤養神性肅宗覽表大悅卽棄之池澤詔召光與安豐王延明議定服章三年六月詔光乘步挽至東西上閣九月進位太保光又固辭光年耆多務疾病稍增而自彊不已常在著作疾篤不歸四年十月肅宗親臨省疾詔斷賓客中使相望爲止聲樂罷諸遊眺拜長子勵爲齊州刺史十一月疾甚勅子姪等曰諦聽吾言聞曾子有云人之將死其言也善啓予手啓予足而今而後吾知免夫吾荷先帝厚恩位至於此史功不成歿有遺恨汝等以吾之故並得各位勉之勉之以死報國修短命也夫復何言速可送我還宅氣力雖微神明不亂至第而薨年七十三肅宗聞而悲泣中使相尋詔給東園溫明祕器朝服一具衣一襲錢六十萬布一千匹蠟四百斤大鴻臚監護喪事車駕親臨撫屍慟哭御輦還宮流涕於路爲減常膳言則追傷每至光坐誦讀之處未嘗不改容悽悼五年正月贈太傅領尚書令驃騎大將軍開府冀州刺史侍中如故又勅加後部鼓吹班劍依太保廣陽王故事謚文宣公肅宗祖喪建春門

外望輻哀感儒者榮之初光太和中依宮商角徵羽本音而爲五韻詩以贈李彪彪爲十二次詩以報光光又爲百三郡國詩以答之國別爲卷爲百三卷焉光寬和慈善不逆於物進退沉浮自得而已常慕胡廣黃瓊之爲人故爲氣概者所不重始領軍于忠以光舊德甚信重焉每事籌決光亦傾身事之元又於光亦深宗敬及郭祚裴植見殺清河王懌遇禍光隨時倂仰竟不匡救於是天下譏之自從貴達罕所申薦曾啓其女壻彭城劉敬徽云敬徽爲荊州五龍戍主女隨夫行常慮寇抄南北分張乞爲徐州長史兼別駕暫集京師肅宗許之時人比之張禹光初爲黃門則讓宋弁爲中書監讓汝南王悅爲太常讓劉芳爲少傅讓元暉穆紹甄琛爲國子祭酒讓清河王懌任城王澄爲車騎儼同讓江陽王繼又讓靈太后父胡國珍皆顧望時情讓者以爲矯飾崇信佛法禮拜讀誦老而逾甚終日怡怡未曾患忿曾於門下省晝坐讀經有鵲飛集膝前遂入於懷緣臂上肩久之乃去道俗贊詠頌者數十人每爲沙門朝貴請誦維摩十地經聽者常數百人卽爲二經義疏三十餘卷識者知其疎略以貴重爲後坐疑於譴次凡所爲詩賦銘贊誄頌表啓數百篇五十餘卷別有集光十一子勵勗勣勸劼勸勤勸勉

勵字彥德器學才行最有父風舉秀才中軍彭城王參軍祕書郎中以父光爲著作固辭不拜歷員外郎騎侍郎太尉記室散騎侍郎以繼母憂去職神龜中除司空從事中郎正光二年拜中書侍郎領軍將軍元義爲明堂大將以勵爲長史與從兄鴻俱知名於世四年十月父光疾甚詔拜征虜將軍齊州刺史以父寢疾衣不解帶及光薨肅宗每加存慰五年春光葬於本鄉又詔遣主書張文伯宣弔焉孝昌元年十二月詔除太尉長史仍爲齊州大中正襲父爵建義初遇害河陰時年四十八贈侍中衛將軍儀同三司青州刺史

挹第損儀同開府主簿

勗武定末征虜將軍安州刺史朝陽伯齊受禪例降

勳字彥儒。亦有父風。司空記室。通直散騎侍郎。寧遠將軍。清河太守。帶槃陽鎮。

將爲逆賊崔景安所害。贈征虜將軍。齊州刺史。

子權太尉參軍事。

勅。武定中。中書郎。

光弟敬友。本州治中。頗有受納。御史案之。乃與守者俱逃。後除梁郡太守。會遭所生母憂。不拜。敬友精心佛道。晝夜誦經。免喪之後。遂菜食終世。恭寬接下。修身厲節。自景明已降。頻歲不登。飢寒請丐者。皆取足而去。又置逆旅於肅然山南大路之北。設食以供行者。延昌三年二月卒。年五十九。

子鴻。字彥彥。少好讀書。博綜經史。太和二十年。拜彭城王國左常侍。景明三年。遷員外郎。兼尚書虞曹郎中。勅撰起居注。遷給事中。兼祠部郎。轉尚書都兵郎中。詔太師彭城王勰以下公卿朝士儒學才明者三十人。議定律令於尚書上省。鴻與光俱在其中。時論榮之。永平初。豫州城人白早生殺刺史司馬悅。據懸瓠叛。詔鎮南將軍邢巒討之。以鴻爲行臺鎮南長史。從三公郎中。加輕車將軍。遷員外散騎常侍。領郎中。延昌二年。將大考百寮。鴻以考令於體例不通。乃建議曰。竊惟王者爲官求才。使人以器。黜陟幽明。揚清激濁。故績效能官。才必稱位者。朝昇夕進。年歲數遷。豈拘一階半級。閱以闕察等位者哉。二漢以降。太和以前。苟必官須此人。人稱此職。或超騰昇陞。數歲而至。公卿或長兼試守。稱允而遷進者。披卷則人人而是。舉目則朝貴皆然。故能時收多士之譽。國號豐賢之美。竊見景明以來。考格三年成一考。一考轉一階。貴賤內外。萬有餘人。自非犯罪。不問賢愚。莫不上中才與不肖比肩同轉。雖有善政如黃龔。儒學如王鄭。史才如班馬。文章如張蔡。得一分一寸。必爲常流所攀。選曹亦抑爲一概。不曾甄別。琴瑟不調。改而更張。雖明旨已行。猶宜消息。世宗不從。三年。鴻以父憂解任。甘露降其廬前樹。十一月。世宗以本官徵鴻。四年。復有甘露降其京兆宅之庭樹。復加中堅將軍。常侍。領郎如故。遷中散大夫。高陽王友。仍領郎中。其年爲司徒長史。正光元年。加前將軍。修高祖世宗起居注。光撰魏史。徒有卷目。初未考正。闕略尤多。每云此史會非我世所成。但須記錄時事。以待後人。臨薨言鴻於肅宗。五年正月。詔鴻以本官修緝國史。孝昌初。拜給事黃門侍郎。尋加散騎

常侍。齊州大中正。鴻在史甫爾。未有所就。尋卒。贈鎮東將軍。度支尚書。青州刺史。鴻弱冠便有著述之志。見晉魏前史。皆成一家。無所措意。以劉淵。石勒。慕容儼。苻健。慕容垂。姚萇。慕容德。赫連屈子。張軌。李雄。呂光。乞伏國仁。禿髮烏孤。李暹。沮渠蒙遜。馮跋等。並因世故。跨轡一方。各有國書。未有統一。鴻乃撰爲十六國春秋。勒成百卷。因其舊記。時有增損。褒貶焉。鴻二世仕江左。故不錄晉劉蕭之書。又恐識者責之。未敢出行於外。世宗聞其撰錄。遣散騎常侍趙邕。詔鴻曰。聞卿撰定諸史。甚有條貫。便可隨成者送呈。朕當於機事之暇覽之。鴻以其書有與國初相涉。言多失體。且既未訖。迄不奏聞。鴻後典起居。乃妄載其表曰。臣聞帝王之興也。雖誕應圖錄。然必有驅除。蓋所以翦彼厭政。成此樂推。故戰國紛紜。年過十紀。而漢祖夷珍。羣豪開四百之業。歷文景之懷柔。疊夏世宗之奮揚威武。始得涼朔同文。并越一軌。於是談遷感漢德之威。痛諸史放絕。乃鈐括舊書。著成太史。所謂緝茲人事。光彼天時之義也。昔晉惠不競。華戎亂起。三帝受制於姦臣。二皇晏駕於非所。五都蕭條。鞠爲煨燼。趙燕旣爲長蛇。遼海緬成殊域。窮兵銳進。以力相雄。中原無主。八十餘年。遺晉僻遠。勢略孤微。民殘兵革。靡所歸控。皇魏龍潛幽代。世篤公劉。內修德政。外抗諸僞。并冀之民。懷寶之士。襁負而至者。日月相尋。雖郛岐之赴太王。謳歌之歸西伯。實可同年而語矣。太祖道武皇帝。以神武之姿。接金行之運。應天順民。龍飛受命。太宗必世重光。業隆玄默。世祖雄才。睿略。闡曜威靈。農戰兼修。掃清氛穢。歲垂四紀。而寰宇一同。儻耳文身之長。卉服斷髮之酋。莫不請朔率職。重譯來庭。隱愍鴻濟之澤。三樂擊壤之歌。百姓始得陶然蘇息。欣於堯舜之世。自晉永寧以後。雖所在稱兵。競自尊樹。而能建邦命氏。成爲戰國者。十有六家。善惡與滅之形。用兵乖會之勢。亦足以垂之將來。昭明勸戒。但諸史殘缺。體例不全。編錄紛謬。繁略失所。宜審正不同。定爲一書。伏惟高祖以大聖應期。欽明御運。合德乾坤。同光日月。建格天之功。創不世之法。開鑿生民。惟新大造。陛下以青陽繼統。敬武承天。應符屈己。則道高三五。顧神至境。則洞彼玄宗。剖判百家。斟酌六籍。遠邁石渠。美深白虎。至如導禮草俗之風。昭文變性之化。固以感彼禽魚。穆茲寒暑。而況愚臣

沐浴太和懷音正始而可不勉彊難革之性砥礪木石之心哉誠知敏謝允南才非承祚然國志史考之美竊亦輒所庶幾始自景明之初搜集諸國舊史屬還京甫爾率多分散求之公私驅馳數歲又臣家貧祿薄唯任孤力至於紙盡書寫所資每不周接暨正始元年寫乃向備謹於吏按之暇草構此書區分時事各繫本錄破彼異同凡爲一體約損煩文補其不足三家五門之類一事異年之流皆稽以長歷考諸舊志刪正差謬定爲實錄商校大略著春秋百篇至三年之末草成九十五卷唯常璩所撰李雄父子據蜀時書尋訪不獲所以未及繕成輟筆私求七載於今此書本江南撰錄恐中國所無非臣私力所能終得其起兵僭號事之始末乃亦頗有但不得此書懼簡略不成久思陳奏乞勅緣邊求採但愚賤無因不敢輕輒散騎常侍太常少卿荊州大中正趙邕忽宣明旨敕臣送呈不悟九臯微志乃得上聞奉勅欣惶慶懼兼至今謹以所訖者附臣邕呈奏臣又別作序例一卷年表一卷仰表皇朝統括大義俯明愚臣著錄微體徒竊慕古人立言美意文致疎鄙無一可觀簡御之日伏深慙悸鴻意如此然自正光以前不敢顯行其書自後以其伯光貴重當朝知時人未能發明其事乃頗相傳讀亦以光故執事者遂不論之鴻經綜既廣多有違謬至如太祖天興二年姚興改號鴻以爲改在元年太宗永興二年慕容超擒於廣固鴻又以爲事在元年太常二年姚泓敗於長安而鴻亦以爲滅在元年如此之失多不考正

子子元祕書郎後永安中乃奏其父書曰臣亡考故散騎常侍給事黃門侍郎前將軍齊州大中正鴻不殞家風式繼世業古學克明在新必鏡多識前載博極羣書史才富洽號稱籍甚年止壯立便斐然懷著述意正始之末任屬記言撰緝餘暇乃刊著趙燕秦夏涼蜀等遺載爲之贊序褒貶評論先朝之日草構悉了唯有李雄蜀書搜索未獲闕茲一國遲留未成去正光三年購訪始得討論適訖而先臣棄世凡十六國各爲春秋一百二卷近代之事最爲備悉未曾奏上弗敢宣流今繕寫一本敢以仰呈儻或淺陋不回睿賞乞藏祕閣以廣異家子元後謀反事發逃竄會赦免尋爲其叔鵬所殺

光從祖弟長文字景翰少亦徙於代都聰敏有學識太和中除奉朝請遷洛拜司空參軍事營構華林園後兼員外散騎常侍爲宕昌使主還授給事中本國中正尙書庫部郎正始中大修器械爲諸州造仗都使齊州太原太守雍州撫軍府長史以廉慎稱遷輔國將軍中散大夫轉太府少卿丞相高陽王雍諮議參軍太中大夫永安中以老拜征虜將軍平州刺史還家專讀佛經不關世事年七十九天平初卒贈使持節征東將軍齊州刺史諡曰貞

子慈懋字德林永熙初征虜將軍徐州征東府長史

長文從弟庠字文序有幹用初除侍御史員外散騎侍郎給事中頻使高麗轉步兵校尉又轉司空掾領左右直長出除相州長史還拜河陰洛陽令以彊直稱遷東郡太守元顥寇逼郡界庠拒不從命棄郡走還鄉里孝莊還宮賜爵平原伯拜潁川太守二年五月爲城民王早蘭寶等所害後贈驃騎將軍吏部尙書齊州刺史

子罕襲爵齊受禪例降

光族弟榮先字隆祖涉經史州辟主簿

子鐸有文才冠軍將軍中散大夫

鐸弟觀寧遠將軍羽林監

史臣曰崔光風素虛遠學業淵長高祖歸其才博許其大至明主固知臣也歷事三朝師訓少主不出宮省坐致台傳斯亦近世之所希有但顧懷大雅託迹中庸其於容身之譏斯乃胡廣所不免也鴻博綜古今立言爲事亦才志之士乎

魏書卷六十七

魏書卷六十七考證

崔光傳鴻乃撰爲十六國春秋勒成百卷○
臣人龍按唐史臣所作晉書載記大都出於此書

魏書卷六十七考證

魏

書 卷六十七考證

四八九

